

Ọkwukwo izi  
ke Mbom  
Pita  
gbaru

**Nhne gbasiri** ọkwukwo izi ka

Ọkwukwo izi ke Mbom Pita gbaru bu ke Pita gbaznenu ele Karaṣi naata awhnwhnu kwnornu be neekpenu Nyenwe ai. Pita kannu be nu agida ele ke Karaṣi nṣowhnusni anya n'aka ele Rom ele kwége nu Jizosi Karaṣi. Be jaazi koriri naata awhnwhnu ke kakwo. Kovu, Pita naakanu be nu be nwe ndidi kwnornu nu kpakara ele sno Nyenwe ai jaata awhnwhnu kwnornu okwnata ovu be. O kaa nu ka jeeme okwnata ovu be si rikne, ke jeenye Nyenwe ai igwugwu n'obochi Jizosi jaava.

Kovu kwnornu nhne Chiokike mernu hite n'ome Karaṣi hi n'enwu lizo, kpakara ele Karaṣi nwernu olile anya. Lele kpa Karaṣi beru osno ta awhnwhnu, omekwo, be nyee a igwugwu, o bu masi kpa nye Karaṣi obula jeenwe igwugwu nga Jizosi jaava.

**Nhne zi** n'okwukwo izi ka

Obekwu ikwu nu okpukpe (1:1,2)

Risi olile anya ai (1:3-12)

Owu budnu zi nsọ lele ele ke Chiokike (1:13---2:17)

Nhne atu awhnwhnu Karaṣi (2:18-25)

Awnwhnu nye Karaṣi (3:1---4:19)

Ezni ele risi ogbako Chiokike (5:1-11)

Obekwu ikwu ipne-aznu (5:12-14)

<sup>1</sup> Mawa, Pita, nye izi Jizosi Karaṣi, naagbaznenu ele Chiokike hohiaru ke gbasaru kpakara eli Pontosi, Galasia, Kapadosia, Esia nu Bitinia okwukwo izi ka. <sup>2</sup> Chiokike Nda

mahjaru anụ, gweru aka a hōru anụ, bīta anụ nsọ hite n'Enine Nsọ, ma anụ noobnonu Jizọsi Karaịsi nsni, ma ọvnarna a snụsnama anụ.

Oru nụ udno banụ anụ aba.

*Olile anya ke zị bụdnu*

<sup>3</sup>Ọznarni zīnu Chiokike nū Nda Nyenwe aī Jizọsi Karaịsi, nye hiri nū obirizi a mūhia aī nū bụdnu ikne. O mernu Jizọsi Karaịsi hi n'ẹnwu lizọ, ke nyernu aī ọkwnata ovu zī bụdnu. <sup>4</sup>A bna n'okehīa mkpe ke zā noolulu olulu, nū ke be mērula emeru, nū ke zā nọobo ọbo, ke Chiokike bitannu anụ n'oligwe. <sup>5</sup>Chiokike jeeji iknernema a bīta anụ tem anụ nahīa ọznohia, kwnornu nū anụ tūkwāsiri a ovu. O jeeme ka whūya iwhne n'ige ipne-aznū. <sup>6</sup>Anụ nọonwudna ọnwudna kītna kwnornu ka, ọ bụ n'ezi nū anụ naata awhnūwhnu zī ọdo n'ọdo n'ige matī ka. <sup>7</sup>Kpakara ọrnarna ka varū ma be tule ọkwnata ovu anụ ma anụ zī snam lele kpa be neeji bēkwnu naagba golu ke noolu olulu. Ọ bụ kpa be neeji bēkwnu nọtule ọkwnata ovu anụ, ma anụ nwehīa ọznarni nū igwugwu n'ọbochi be jookpume Jizọsi Karaịsi. <sup>8</sup>Nye anụ whnūrnū n'anya, ọ bụ n'ezi nū anū jīle anya anū lawūru whnū a, anū kweru nū ya, ọ bụ n'ezi nū anū jīle anya anū lawūru whnū a kītna. Kam kpayarū anū nwernu snarnīma k'agīda ke ọnu jọkowali. <sup>9</sup>Anū nahjaru nhne anū kwnatarū ovu ke bụ ọznohia ke mkpūru ovu anū.

<sup>10</sup>Ka bụ ọznohia wam ele ọwhnurninya piosiri rikne, nyosna nhne gbasīri a, be whnūrnū ọwhnurninya gbasīri nkesi wam Chiokike jeenye anū. <sup>11</sup>Be pioru ọ mahīa ige wam nū kpa ọ jọoburu bụ nhne Enine Karaịsi ke zī nū rime be kwuru, nhne gbasīri awhnūwhnu Karaịsi jaata nū igwugwu ke joosno a. <sup>12</sup>Chiokike kpumennu ele ọwhnurninya ka nū ẹrnu be būo ke be, kọvu ke jaabnanū anū iru, bụ ke be kwuru hite n'ọnu ele znirni anū izi ọma,

hite nụ rikne ke Enine Nsọ ke hiri n'oligwe va. Ka bụ nhne ke ele enine izi pioru o lebna anya nụ rime a.

*Anụ ziri nsọ*

<sup>13</sup> Kam kpayarụ, anụ suru ajnị n'ovu anụ, anya dū anụ ẹli, anụ neele oru ke Jizọsi Karaịsi jeenye anụ anya nga be kpumernu a. <sup>14</sup> Lele rụmu ke noobnonu Chiokike nsnị, anụ láchna nụ rime nhne ojo ke nọogwnu anụ nụ mbòm nga anụ zị lele ele máa nhne. <sup>15</sup> Tnụnuma, lele kpa nye wam sukwuru anụ zị nsọ, anụ ziri nsọ nụ kpakara nhne anụ neeme. <sup>16</sup> Kwnornu nụ be gbarụ a n'ọkwukwo nsọ, kaa, “Anụ ziri nsọ, lele kpa me zị nsọ.”

<sup>17</sup> Ọ bụru nụ anụ noosukwu Nda ke zá neele badnụ anya n'ikpe, bụ nye neekpe badnụ ọbula lele kpa ẹrnu be jiri zị, anụ ziri bụdnụ lele ele izne nọotu ogwnu n'ọwa ka. <sup>18</sup> Anụ magwụ nụ ọ búo golu mọbu siliva ke noolulu olulu bụ nhne be jiri gbahịa anụ hite n'aka nhne ojo ke anụ nahiaru n'aka ele nda anụ ọknani, <sup>19</sup> kọvu ọ bụ ọvnarna Karaịsi ke zị okne ọnu ahịa, lele nnwọ atnụrnu ke nwée ọru mọbu ntupo. <sup>20</sup> Chiokike hōhiaru a tụtụ sụ ọ tūru ntụ-ẹli ọwa. Kọvu o mernu a ọ whụya iwhe n'ọbochi ipne-aznụ ka kwnornu anụ. <sup>21</sup> Anụ kweru nụ Chiokike hite nụ ya, nye o mernu ma o hi n'ẹnwu lizo, nyee a igwugwu, ma olile anya anụ nụ ọkwnata ovu ziri nụ Chiokike.

<sup>22</sup> Hne anụ bítaru ẹhni anụ snam hite n'obno nsnị n'ezi ọka, nọowhnu ele kweru ekwe n'anya, anụ gweru ọwhnun'anya ke hi n'ovu anụ whụya whnụ ibne anụ n'anya. <sup>23</sup> Be mụrnu anụ berere, ọ búo hite nụ mkpuru ke nooro oro, kọvu hite nụ mkpuru ke zá nooro oro, ke bụ ikwu-ọnu Chiokike ke zị ọkwnukokwnu. <sup>24</sup> Ọkwukwo nsọ kwuru,

“Kpakara badnụ nụ lele achara,  
igwugwu badnụ nụ lele okoko achara,  
achara chanwụ, okoko a dnahala,

<sup>25</sup> kọvu ikwu-ọnu ke Nyenwe ai jaazi ọkwukokwnu.”  
Ka bu ikwu-ọnu ke izi oma wam be znirni anu.

## 2

<sup>1</sup> Kam kpayaru, anu gweme kpakara nhne ojo n'ehni anu, irno, nu kpakara aghigho, nu ruwgnu lawuru, nu okwno-awuwa nu okaja. <sup>2</sup> Lele rumu be murnu ikne, akpiri ke mini-remma ke zi snam ke enine, ke bu ikwu-ọnu Chiokike nokpo anu bekwnu, ma anu nwọ a, sopiya nu badnu du oznohia. <sup>3</sup> Kitna, anu raturu a riro whnu nu Nyenwe ai buru oma.

### *Akaworugwu zi budnu*

<sup>4</sup> Anu vakwnusi Nyenwe ai lele rugwu ke zi budnu ke ele badnu juru, kovu ke Chiokike hohiaru, zi okne onu ahia n'anya a. <sup>5</sup> Anuwa masi, lele akaworugwu ke zi budnu, be jiri anu wu Oro Nso ke enine, ma anu buru ele okwa ariohna zi nso, ele jaakwa ariohna enine ke Chiokike jaanarnu hite nu Jizosi Karaisi. <sup>6</sup> Be gbaru a n'okwukwo nso, kaa,

“Le, m bitaru m nu rime Zayoni,  
akaworugwu nsukala oro me hohiaru ke zi okne onu  
ahia,  
nye obula ke tukwasiri a ovu,  
iwhnerne jotu a.”

<sup>7</sup> Nu hne anu ele kweru ekwe zi, akaworugwu ka zi okne onu, kovu hne ele kwe ekwe zi, be gbaru a n'okwukwo nso, kaa,

“Akaworugwu ke ele noowu oro juru,  
kiyam ghulam risi nsukala oro.”

<sup>8</sup> Be gba kwno,

“Akaworugwu ke jeeme badnu kpobi ochi,  
nu rugwu ke jeeme be dna.”

Be dnarnu kwnornu nu be kwege ikwu-onu Chiokike, lele kpa echiche Chiokike zinu be.

<sup>9</sup> Kovu anu bu ele Chiokike jiri aka a hohia, ele ariohna ke eze, mbam ke zi nsọ, ele ke Chiokike, ma anu gesi oznarni nye wam sukwuru anu hite nu rime ochichiri bna nu rime iwhne a zi igwugwu. <sup>10</sup> Nu mbom anu buo ele ke Chiokike, kovu kitna, anu bu ele ke a, ele nwee obirizi nu mbom, kovu kitna, Chiokike donnu anu obirizi.

<sup>11</sup> Ele me whnuru n'anya, m naariasno anu, lele ele izne nu ele neewhe ewhe n'owa ka, anu nyee nhne ojo ke nogwnu anu, ke nolu masi ogwnu megidne mkpuru ovu anu oghere. <sup>12</sup> Anu wu budnu ke buru oma n'esilawuru ele ma Chiokike, o bu n'ezi nu be noobno anu nhne ojo, kovu be whu eru oma anu, ma be znarni Chiokike n'obochi o jeelekasi ai.

*Bit*a ehni anu nu mkpururu  
ele ochichi

<sup>13</sup> Kwnornu nu Nyenwe ai, anu bita ehni anu nu mkpururu ochichi ke badnu, mobu eze, lele nye risi, <sup>14</sup> mobu ele ochi eli ele o ziyaru o ta ele ojo awhnuwhnu, nu o znarni nye neeme nhne oma. <sup>15</sup> Ka bu nhne Chiokike noopio, ma anu hite n'ernu oma anu kpusni onu ele iwhnirniwhno. <sup>16</sup> Anu wu budnu lele ele nwernu ehni be. Anu ji onodi wam kpusni nhne ojo, kovu anu ziri budnu lele ele izi Chiokike. <sup>17</sup> Anu so kpakara badnu anya, anu whu rumu Nda n'anya, anu tu ogwnu Chiokike, anu sobisinu eze.

*Awhnuwhnu* Karaishi

<sup>18</sup> Ele ghi, anu gweru oso anya bita ehni anu nu mkpururu ele nwe anu. Anu menu nye ovu oma nu nye udno kpoi, ma nye aka rikne masi. <sup>19</sup> Kwnornu nu Chiokike jogozi anu o buru nu anu taru awhnuwhnu hne o za nhne ojo anu mernu, kovu kwnornu nu anu turu ogwnu

Chiokike. <sup>20</sup> Ndaa igwugwu ke anụ jeenwe, ọ buru nụ anụ taru awnụwhnu kwnornu nụ nhne ojo anụ mernu? Kọvu anụ gwuzogidne n'awnụwhnu hne anụ mernu nhne oma, Chiokike jọgozi anụ.

<sup>21</sup> Ọ bụ nhne be sukwuru anụ, Karaịsi taru awnụwhnu nụ risi anụ, ghasanụ anụ nhne atụ, ma anụ snornu ronu ọchi a.

<sup>22</sup> “Ọ zá mmehie o mernu,  
 ọ zá aghigho be piohāru n'onu a.”

<sup>23</sup> Nga be mernu a nhne iwhnerne, o mégwarnuge, nga ọ taru awnụwhnu, ọ kpála rikne, kọvu o gweru ẹhni a yisi n'aka nye wam neekpe ikpe buru oma. <sup>24</sup> Ya n'iwuru a jiri ẹhni a vuru kpakara mmehie aị n'olu ọgba, ma a buru ele nwuru onwu ghasa mmehie, ziri budnu ele mee mma. O jiri ẹnya a gwọ kpakara ẹhni igbugbu aị. <sup>25</sup> Anụ nụ lele atnrnu ke whuru apna, kọvu ke hiehnarnu hne Nye Ọznuznu nụ Nye Risi mkpuru ovu anụ zi.

### 3

#### *Ele nzi nụ nnwerne*

<sup>1</sup> Kpam masi, anụ ele bu nnwerne, anụ bita ẹhni anụ nụ mkpururu nzi anụ. Ọ burubedi nụ be bu ele kwéle ikwu-onu Chiokike, be jeenwe rikne hiri nụ agwa oma anụ kweru hne anụ kwúle oka, <sup>2</sup> kpa be jowhnu anụ noowu budnu buru oma ke zi masi snam n'oso n'anya. <sup>3</sup> Anụ kwé mma anụ buru nhne ke anya ọowhnu kpọi, ọ búo kpa anụ kparu risi anụ, mọbu golu anụ tu n'ẹhni, mọbu iwo marnu mma anụ wogwu. <sup>4</sup> Kọvu mma anụ buru agwa oma wam tugwaru otugwa ke zi nụ rime ovu, ke bu nhne ẹyi ke zá nooro oro, ke bu ọzi wohnernerne nụ enine ke udno, ke zi okne onu ahia n'anya Chiokike. <sup>5</sup> Ọ bụ kpa ele rinya gbaka zi nsọ ele tukwasiri Chiokike ovu mernu ẹhni be mma, be bitaru ẹhni be nụ mkpururu nzi be. <sup>6</sup> Sera nụ kpam, o

bnonnu Ebereham nsni, noosukwu a, “Nyenwe m.” Anụ bụ rụmu a rinya, ọ bụru nụ anụ jeeme nhne ọma gharụ ọ tū ogwnu nhne ọbula.

<sup>7</sup> Kpam masị, anụ ele bụ nzi, anụ jiri ọso anya nụ akọ, anụ nụ nnwerne anụ wuru, hne anụ magwụ nụ be bụ ele nwée rikne. Anụ nụ be jeekehia nkesi bụdnu kwó okwo Chiokike neekesi anụ n'etekne. Anụ mee kpam, ọ zị nhne ọbula bnosni okpukpe anụ.

*Awhnụwhnu* kwnornu  
ome nhne bụru ọma

<sup>8</sup> N'ipne-aznụ, kpakara anụ nwe otu ovu, anụ donu ibne anụ obirizi, anụ whnụ ibne anụ n'anya lele rụmu nda, anụ nwe obirizi n'ehni ibne anụ, anụ bụru ele be gwednarnụ ẹli. <sup>9</sup> Anụ jí nhne ojo kwuhnata nhne ojo, anụ gógwna ngugo, kovu anụ nọgozi ọgozi, kpa Chiokike sukwuru anụ ma anụ kehia ngozi masị. <sup>10</sup> Kwnornu nụ ọkwukwo nsọ kwuru,

“Nye ọbula ke whnurnu bụdnu n'anya,  
ke noopio ọbochi ọma,  
ọ bita ọnu a ma ọ gharụ o kwu ọka ojo,  
bita masị mgbele-ọnu a n'aghalaghala.

<sup>11</sup> Ọ gharụ nhne ojo, mee nhne bụru ọma,  
pio udno, gbasno a.

<sup>12</sup> Kwnornu nụ anya lawuru Nyenwe aị zị n'ehni ele mee  
mma,  
nsni a nọonu okpukpe be,  
kovu ruwhnu Nyenwe aị neemegidne ele neeme nhne  
ojo.”

<sup>13</sup> Nyele jeemejọ anụ, ọ bụru nụ anụ gwuzosi rikne nụ nhne ọma? <sup>14</sup> Ọ bụru nụ anụ ta awhnụwhnu kwnornu nụ anụ mernu nhne ọma, ovu sọ anụ n'ọnu, ogwnu tū anụ kwnornu be, ovu lákwadia anụ mini.

<sup>15</sup> Anụ sọbisinu Karaịsi lele Nyenwe aị nụ rime ovu anụ. Anụ jiknerneru ọ sa ajiji nye ọbula jaasikwa anụ nhne gbasiri olile anya wam zị n'ovu anụ hite n'ọso anya nụ ovu zị wọhnerne. <sup>16</sup> Anụ bita ovu anụ snam, ma ele nookwu nhne ojo kwnornu agwa ọma anụ kweru nụ Karaịsi, iwhnerne jootu be nụ nhne ojo be nookwu. <sup>17</sup> Ọ ka mma, ọ bụru nụ ọ bụ echiche Chiokike nụ anụ taru awhnụwhnu kwnornu nụ anụ mernu nhne ọma karu kwnornu nụ anụ mernu nhne ojo. <sup>18</sup> Karaịsi nwuru otu mgba kwnornu mmehie aị, nye ikpe mána nwuru kwnornu ele ikpe marnu. Karaịsi mernu ka ma o duru anụ du hne Chiokike zị. Ọ nwuru enwu n'anọ-ehni, kovu ọ zị budnu n'Enine, <sup>19</sup> nụ rime enine zị budnu, \* o znernu zni ele enine ke zị n'oro ikelu izi ọma. <sup>20</sup> Ka bụ ele zá noobno nsni, kpa Chiokike ji nkasi ovu neese nga Noa ọotu ọgbo ke be jiri znọhia badnu ele nụ ele, badnu ọsato kpọi hite nụ mini. <sup>21</sup> Ka neegesi nụ ọwu mini znọhiaru anụ, ke bụ nọorio Chiokike ovu zị snam hite n'olizọ n'enwu ke Jizọsi Karaịsi. Ọ búo ọsnuma rune ke ehni. <sup>22</sup> Karaịsi bụ nye laru oligwe daziri ẹli n'akarikwnunga Chiokike, hne kpakara ele enine izi nụ ọchi risi nụ rikne zị nụ mkpururu a.

## 4

### *Owunu Chiokike budnu*

<sup>1</sup> Kpam masi, Karaịsi taru awhnụwhnu n'anọ-ehni a, anụ jiknerneru o mee kpam masi, kwnornu nye taru awhnụwhnu n'anọ-ehni a zima neeme mmehie. <sup>2</sup> Kam kpayaru, ọ zá noowu budnu a n'owa ka lele kpa agwnuru nhne ojo ke badnu, kovu lele echiche Chiokike. <sup>3</sup> Kwnornu nụ ige anụ tuwhuru n'ige wheru ewhe noowu budnu lele ele máa Chiokike zulem. Ige wam anụ noowu budnu ke zila richna, agwnuru nhne ojo, onwo manya, okne otne

---

\* 3:19 hite nụ Enine Nso



eri, nụ ọkwa renwu. <sup>4</sup> Kịtna, o jiri be anya nụ anụ zá noosno be neeme nhne ojo berere, ke kpayarụ be nọovu anụ ọnu. <sup>5</sup> Kọvu be jaasa ajiji gbasiri ẹhni be nụ ruwhnu nye wam jeekpe ele zị bụdnu nụ ele nwurnu ọnwu ikpe. <sup>6</sup> Kam kpayarụ, be jiri zni ele nwurnu ọnwu izi ọma nga be zị, ma be kpe ikpe be hite nụ nhne be mernu nga be zị bụdnu lele badnụ, ma be ziri bụdnu n'enine lele Chiokike.

<sup>7</sup> Mbimambi kpakara nhne zị ndundu. Anụ nwe anya udno, anya dụ anụ ẹli, anụ neekpe okpukpe. <sup>8</sup> Ke kakwo, anụ nwe ọwhnun'anya zị omimi n'esilawuru anụ, kwnornu nụ ọwhnun'anya nookpusni agida mmehie. <sup>9</sup> Anụ jí ntamu nabnanya ibne anụ. <sup>10</sup> Nye ọbula gweru nkesi ọ nahiaru n'aka Chiokike znenu ibne a izi, gweru okwesi ọkwnata ovu neekesi oru Chiokike zị ọdo n'ọdo. <sup>11</sup> Nye neezni izi ọma, ọ zni a lele nụ ọ bụ ikwu-ọnu ke hi n'ọnu Chiokike whụya. Nye neezne izi, o mee a lele Chiokike nyernu a iknernema, ma be znarni Chiokike nụ rime kpakara nhne hite nụ Jizọsi Karaịsi, nye nwe igwugwu nụ rikne tim tọm. Amim.

*Awhnụwhnu* lele  
nye Karaịsi

<sup>12</sup> Ele me whnurnu n'anya, ọ gbagwoji anụ anya kwnornu ọrnurna zị igbugbu ke naarna anụ lele nụ ọ bụ nhne ikne neeme anụ. <sup>13</sup> Kọvu anụ nwudna, kwnornu nụ anụ sno Karaịsi takọ awhnụwhnu, ma anụ nwe ovu ọso n'ọnu zị agida nga be jookpume igwugwu a. <sup>14</sup> Ọ bụru nụ be mernu anụ nhne iwhnerne kwnornu nụ rẹwhna Karaịsi, ovu sọ anụ n'ọnu, ka neegesi nụ Enine igwugwu, ke bụ Enine Chiokike wu nụ rime anụ. <sup>15</sup> Ọ zá nye ta awhnụwhnu n'esilawuru anụ lele nye gburu badnụ, mọbu nye buznu, mọbu nye mernu nhne ojo berere, mọbu nye neelebna anya nụ nhne gbásila a. <sup>16</sup> Kọvu, ọ bụru nụ nye ọbula ta awhnụwhnu lele nye Karaịsi, iwhnerne túko

nye wam, kọvu o nyee Chiokike ọznarni kwnornu nụ be nookwu a nye Karaisi. <sup>17</sup> Ige valẹm nga be jaapanizo ikpe n'ezi-nụ-oro Chiokike. Ọ bụru be panizo ikpe nụ hne a zi, ndaa kpa ọ jaazinu ele kwéle izi ọma Chiokike?

<sup>18</sup> Ọ bụru nụ ọ jaara ẹhni ọ znọhia ele mee mma, ndaa hne ele máa Chiokike nụ ele mmehie jaazi?

<sup>19</sup> Kam kpayarụ, nye ọbula ke naata awnụwhnu lele kpa echiche Chiokike jiri zi, gweru ovu ọma yisi ẹhni a kpm kpm n'aka Nye Okike nye kwesiri ọkwnata ovu. Nye wam zne nụ ruwhnu neeme nhne ọma.

## 5

*Ele okno badnụ nụ*  
ele ikoro

<sup>1</sup> M naariasno ele okno badnụ zi n'esilawuru anụ hne me bụ masị nye okno badnụ, m whnurnu m awnụwhnu Karaisi taru, m jeekehia masị igwugwu a nga be jookpume a. <sup>2</sup> Anụ znụ atnurnu Chiokike ke zi nụ mkpururu anụ, neelegidne be anya nụ kpakara ovu anụ kpa Chiokike pioru a, ọ búo nụ mkpa kpagwụ anụ, kọvu kwnornu nụ ọ bụ nhne kwesiri omume. Anụ rnụ ẹrnu anụ, ọ búo kwnornu iru anụ jeenwehia, kọvu nụ ọ nhne zi n'ovu anụ n'omume. <sup>3</sup> Anụ méé be lele nụ be bụ nhne ke aka anụ, kọvu anụ bụru nhne atụ be joosno. <sup>4</sup> Nga Nye Risi Ọznuznu Atnurnu varu, anụ jaanahia okpu-eze zi igwugwu ke jaazi noonwu va-a-a tem.

<sup>5</sup> Kpm masị, rumu ikoro, anụ bita ẹhni anụ nụ mkpururu ele okno badnụ. Kpakara anụ woru ọzi wọhnerne n'ovu lele iwo, neeznenu ibne anụ izi. Kwnornu nụ ọkwukwo nsọ kwuru,

“Chiokike noogwuzogidne ele oknomokno,  
kọvu o neenye ele zi wọhnerne n'ovu oru.”

<sup>6</sup> Kam kpayaru, anu gwedna ehi anu nu mkpururu aka dikne ke Chiokike, o joovulizo anu olu n'ige ke a. <sup>7</sup> Anu vukwnusi a kpakara mkpa anu, kwnornu nu nhne gbasiri anu neemetu a n'ovu.

<sup>8</sup> Anya du anu eli, anu neese nse, nye irno anu bu Ekwensu, naagbaghari lele odum noogbo ogbugbo noopio nye o jeeri. <sup>9</sup> Anu ziri kwem nu okwnata ovu anu, anu gwuzogidne a, kwnornu nu rumu Nda anu nu kpakara owa naagawhe otu awnhnuwhnu wam.

<sup>10</sup> Nga anu taru awnhnuwhnu ige mati, Chiokike ke oru nye sukwuru anu bna n'igwugwu a kwó okwo nu Karaisi, joogwuzote anu, nyee anu rikne, gba anu inwe. <sup>11</sup> Kpakara rikne ochichi bu ke a okwnukokwnu. Amim.

### *Obekwu ipne-aznu*

<sup>12</sup> Sailasi nwene ai rukna ke kwesiri okwnata ovu yinnu m aka gba okwukwo izi mati ka, m naariasno anu naagba akebne nu ka bu ezi oru Chiokike n'olu hne anu gwuzo.

<sup>13</sup> Ogbako Chiokike ke zi nu Babiloni,\* ke be hohiakoru anu nu ya neebekwu anu, ma Maki nnwo m. <sup>14</sup> Anu gweru owhnun'anya Karaisi neebekwu ibne anu.

Udno dazinu kpakara anu ele zi nu rime Karaisi.

---

\* 5:13 Ka bu Rom

## Tɛsitamenti Ikne n'Ọnu Ikwere New Testament in Ikwere

copyright © 2010 Wycliffe

Language: Ikwere

Translation by: Wycliffe

Ikwere – (ikw) Nigeria

The Iwerre language of Nigeria can also be spelled Ikwere and Ikwerrri. This language is spoken primarily by the Ikwere people who live in the Rivers State of Nigeria and is one of the many ethnic groups in the Niger Delta. There were more than 23,000 speakers of this language in 1973. There is also a considerable local interest in literacy and grammar.

### Copyright Information

© 2010, The Nigeria Bible Translation Trust. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789789076369

New

The New Testament

in Ikwere

**© 2010, The Nigeria Bible Translation Trust. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

Updates

eBible.org

---

PDF generated using Haiola and XeLaTeX on 3 Jul 2018 from source files dated 3 Jul 2018

c17ee3a1-1c7a-5c05-8e0f-5043e8228d89